



Sambanwá

GIYA SA PAGSAMBA KAN BANWAAN NIN DIOS

IKA-XXVI DOMINGO KAN ORDINARIONG PANAHON
26 SEPTIEMBRE 2021 • TAON B • VERDE

RITO SA PAGPOÓN

Pataratara

C — An liturgia ngonian na Domingo inaapodan kita gabos na talikdan an kasâlan asin padagos na magpahiling nin paggalan sa satuyang kapwa. Magkaboronyog kita sa pagomaw sa Dios na panô nin karahayan.

Antifona sa Paglaog

(Dan 3, 31. 29. 30. 43. 42)

(Sinambit kun mayo nin Awit sa Paglaog)

Kagurangan, gabos na ginibo mo samo, ginibo mo sa tunay na paghukom, ta nagkasalâ kami saimo

asin dai kami nagsunod kan saimong mga pagboót; alagad pamurawaya an saimong ngaran, asin giboha samo susog sa kadakulaan kan saimong pagkaherak.

Pagpangurus asin

Pagtaong-galang (Tindog)

P — Sa ngaran kan Ama, asin kan Aki, asin kan Espiritu Santo.

B — Amen.

P — An Kagurangan mapasaindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio.

Gabos — Nagkukumpisal ako sa Dios na makakamhan, asin saindo, mga tugang, ta nagkasalâ ako nin makuri sa isip, sa tataramon, sa gibo, asin sa kapabayaan: salâ ko, salâ ko, makuring salâ ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangan tang Dios.

P — Maherak man lugod satô an Dios na makakamhan asin, pakapatawada an satong mga kasâlan, darahon kita sa buhay na daing kasagkoran.

B — Amen.

Kagurangan, maherak ka

P — Kagurangan, maherak ka.

B — Kagurangan, maherak ka.

P — Cristo, maherak ka.

B — Cristo, maherak ka.

P — Kagurangan, maherak ka.

B — Kagurangan, maherak ka.

Kamurawayan

Gabos — Kamurawayan sa Dios sa kaitaasan asin sa dagâ katoninongan sa mga tawong marahay an boót. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatan mi ika huli kan dakula mong kamurawayan, Kagurangan na Dios, Hadeng langitnon, Dios Amang makakamhan. Kagurangan Aking Bogtong, Jesu Cristo, Kagurangan na Dios, Cordero kan Dios, Aki kan Ama, ika na nagpaparâ kan mga kasâlan kan kinaban, kaheraki kami; ika na nagpaparâ kan mga kasâlan kan kinaban, akoo an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

Colecta

P — Mamibi kita.

O Dios, na nagpapahayag kan saimong kapangyarihan orog na sa pagpatawad asin pagkaherak, dugangan mo samo an saimong gracia, tanganing, danay na nag-aandam sa saimong panuga, gibohon mo kaming makiheras sa mga langitnon na kayamanan. Huli ki Jesu Cristong Kagurangan ni amo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahonan kan mga panahon.

B — Amen.

Enot na Babasahon (Tukaw)

(Bilang 11, 25-29)

An Espiritu na itinatao duman sa mga naglilingkod sa Dios sarong dakulang diosnon na balaog.

Pagbasa sa Libro nin mga Bilang.

An Kagurangan huminilig hale sa panganoron asin nakipag-olay ki Moises. Kinua an Espiritu na yaon ki Moises asin iheras sa pitong pulong gurang. Kan an Espiritu nakalaog sa sainda, nagpoon sinda pagprofesia. Duwang lalaki, si si Eldad asin si Medad, nagpawalat duman sa kampo. An Espiritu huminilig man sainda; minsan dai sinda nagduman sa tolda, an saindang mga ngaran na lista sa kaibahan nin gabos. An mga ini nagpoon pagprofesia duman sa kampo. May sarong aki na nag-osip kaini ki Moises: “Si Eldad asin si Medad nagprofesia man duman sa kampo.” Dangan si Joshua, aki ki Nun na katabang ni Moises poon kan siya sadit pa, nagsabi: “Moises sakong Kagurangan, pauntokon mo sinda.” Si Moises nagsimbag: “Ano ka nauuri dahil sakuya? Auot pa man lugod an gabos na banwaan nin Kagurangan magin profeta: asin itao nin Kagurangan an saiyang espiritu sa sainda gabos.”

Tataramon kan Kagurangan.

Gabos — Salamat sa Dios.

Salmo Responsorio

(Salmo 18, 8. 10. 12-13. 14)

S — An tugon nin Kagurangan, kaogmahan nin sakuyang puso.

1. Banal na tugon nin Kagurangan, nagtataong-buhay sa kalag. Mapapaniwalaan an tugon nin Kagurangan: nagtataong-donong sa mapakumbaba. (S)
2. Banal an pagkatakot sa Kagurangan, nagdadamay sagkod pa man. Totoo an mga pagboót nin Kagurangan, asin gabos matanos. (S)
3. Sa sainda nakanood an saimong surogoon, may dakulang balos an pagtubod kaiyan. Siisay an makakaisi kan gabos niyang salâ? Sa mga hilom kong salâ patawada ako. (S)

LITURGIA KAN
TATARAMON

4. Likayan sa kasâlan an saimong surogoon; hare pagtugot na iyan maghade sakuya. Ako magigin daing-digta: linigi ako sa kasâlan na makuri. (S)

Ikaduwang Babasahon

(Santiago 5, 1-6)

An ikaduwang babasahon nagpapahayag manonngod kan patanid sa mga mayaman na nadadara kan pagkamasadiri.

Pagbasa sa Surat ni Apostol Santiago

Sarong patanid sa mga mayaman. Magtangis kamo, pagtangisan nindo an mga kasakitan na maabot sa saindo. Ralapa na an saindong mga kayamanan; kinakakan na kan mga polilyo an saindong mga gubing. Tinataklâ na an saindong bulawan asin plata: taklâ na iyo an masaksi laban saindo asin matunaw kan saindong hawak. Kalayong naglalaad an saindong sinaray bilang mga kayamanan para sa mga huring aldaw. Mga para-ani, nag-aani sa saindong mga oma dinaya ninda sinda. Dangoga an kinukurahaw kan mga tandan na saindong pinugol. Isipon nindo na an kinurahaw kan mga para-ani nakakaabot sa talinga nin Kagurangnan nin mga hukbô. An saindong buhay digdi sa dagâ buhay sa karangahan asin kalabihan. Sa panahon nin boronðan binabasog nindo an saindong mga puso. Kamo an nagpadusa asin nagpagadan kan tawong daing salâ: asin dai siya nagtumang saindo.

Tataramon kan Kagurangnan.

Gabos — Salamat sa Dios.

Pagrokyaw

(Cf. Jn 17, 17) (Tindog)
(Sinasambit kun dai inaawit an Alleluia)

Alleluia, alleluia! An saimong tataramong Kagurangnan, katotoohan: pabanala kami sa katotoohan. Alleluia, alleluia!

Evangelio

(Marcos 9, 38-43)

An naggigibo nin karahayan, nagsusunod sa kabôtan nin Dios, dapat na magpadagos sa saiyang mga gawe. Dai dapat pag-ulangon. Iyo ini an ipinapaabot satuya kan evangelio.

P — An Kagurangnan mapa-saindo.

B — Asin sa saimong espiritu.

P — ✠ Pagbasa kan Evangelio susog ki San Marcos.

B — Kamurawayan saimo, Kagurangnan.

Si Jesus nagsabi saiya: “Maestro, nakahiling kami nin lalaki na

nagpapalayas nin mga demonio sa ngaran mo, asin samuyang sinaway, huli ta dai siya sa kaibahan niato.” Si Jesus nagsabi sinda: “Dai nindo pagsawayon, huli ta dai nin minagibong Milagro sa ngaran ko an magpapakaraot sako. An bako niatong kalaban, kaapil niato. Totoong sinasabi ko saindo: an nagpapainom saindo nin sarong basong tubig, huli ta kamo nagsusunod sa Mesias, dai nahahalean nin balos.” Si Jesus nagsabi: “An magin dahilan nin pagkasalâ sa sarô kaining mga saradit na nagtutubod sa sakuya, marahay pa na an gapong-gilingan igakod sa saiyang liog, dangan itapok siya sa dagat. Kun an saimong kamot magin dahilan nin pagkasalâ, putola: marahay pang makalaog ka sa buhay, sarô sanang kamot, ki sa may duwang kamot, alagad mapapa-imprierno, duman sa kalayong dai napaparong. Kun an saimong mga bitis magin dahilan nin pagkakasalâ, putola: marahay pang makalaog ka sa buhay, sarô sanang bitis, ki sa may duwang bitis alagad mapapa-imprierno. Kun an saimong mata magin dahilan nin pagkasalâ, huwalata: marahay pang makalaog ka sa kahadean nin Dios, sarô sanang mata, ki sa may duwang mata, alagad mapapa-imprierno; duman an ulod dai nagagadan asin an kalayo dai napaparong.

P — Marahay na Bareta kan Kagurangnan.

B — Pag-omaw saimo Cristo.

Homilia (Tukaw)

Pagrokyaw

kan Pagtubod (Tindog)

Credo Niceno-Constantinopolitano

Gabos — Nagtutubod ako sa sarong Dios Amang makakamhan, kaggibo kan langit asin dagâ, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Dios, asin namundag gikan sa Ama bagô kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saro sa pagka-Dios sa Ama: huli saiyang nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(Sa mga minasunod na tataramon, abot sa asin nani-tawo, an gabos minaduko.)

Asin nani-laman huli kan Espiritu Santo ki Virgen Maria, asin nani-tawo. Ipinako pa sa cruz para satô kan panahon ni

Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat susog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa sarô, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasâlan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Mamibi kita sa Dios na paliwanagan kita mantang dinadara niato saiyang an mga pangangaipo kan kinaban niatong baranga asin siriblag.

S — Kagurangnan, hinanyoga an samong pamibi.

1. Tanganing magdanay sa Simbahan an katoninongan asin pagkaoroyon na an Evangelio tunay na ikaharubay sa kinaban, ipamibi niato sa Kagurangnan. (S)
2. Tanganing iwaras sato an balaog nin kapatawadan asin pagkipag-ulian, asin an kaomayan sa mga kulog-boôt na dara kan pagkabaranga, ipamibi niato sa Kagurangnan. (S)
3. Tanganing tunay na mamidbidan an karahayan nin mga tawo bilang kasangkapan kan Espiritu Santo na naghiihiro sa kinaban, ipamibi niato sa Kagurangnan. (S)
4. Tanganing an mga maedad na, mga nagsosolo-solo, mga biyadi asin mga naghehelang magkusog huli kan mamomoton na presencia kan Dios, ipamibi niato sa Kagurangnan. (S)
5. Tanganing an mga gadan niatong katood na naenot na sato makisumaro sa katoninongan asin kaogmahan kan kahadean kan Dios, ipamibi niato sa Kagurangnan. (S)

P — Langitnon na Ama, tabangi kaming mahiling an ibang tawo susog sa saimong mga inata.

Warasan samo an mahiwas na pagkasabot asin an pagkamatinao kan puso tanganing akoon an marahay saen man ini maggikan. Huli ki Cristo samong Kagurangnan.

B — Amen.

LITURGIA KAN EUCARISTIA

Pagdolot *(Tukaw)*

(Sinambit kun mayong Awit sa Pagdolot)

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — Pag-omawon an Dios sagkod pa man.

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — Pag-omawon an Dios sagkod pa man.

P — *(Tindog)* Magpamibi kamo, mga tugang: tanganing an sako asin an saindong atang maako man lugod kan Dios Amang makakamhan.

B — Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.

Pamibi sa mga Dolot

P — O Dios na maheherakon, warasan samo, na ining samong pagdolot maako mo, asin huli kaiyan mabukasan para samo an burabod nin gabos na bendicion. Huli ki Cristo samong Kagurangnan.

B — Amen.

Prefacio III sa mga Domingo kan Ordinariong Panahon

An pagligtas kan tawo sa paagi nin tawo

P — An Kagurangnan mapa-saindo.

B — Asin sa saimong Espiritu.

P — litaas an mga puso.

B — Initaas mi na sa Kagurangnan.

P — Magpasalamat kita sa Kagurangnan, satuyang Dios.

B — Maninigo asin Dapat.

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Ama, Dios na makakamhan na daing kasagkoran:

Nakakagami-aw kami, na, sa daing sukol mong kamurawayan, nagsanggawad ka sa mga may kagadanan sa bagsik kan saimong pagka-dios; ata ngani itinagama mo an bulong sa samo man sanang pagka-magagadanon, asin kun ano an ikina-pahamak kan mga nawara iyo man an ilinigtas mo sainda, huli ki Cristo samong Kagurangnan.

Kaya an hukbô nin mga Angeles nagsasamba kan saimong kamahalan, nag-oogma sa atubang mo sagkod pa man. Auot pa man lugod na ipagboót mo na makasanong sainda an samong mga tingog, malodok na nagpapahayag nin pagtubod na nagsasabi:

Gabos — Banal, Banal, Banal an Kagurangnan Dios ni mga hukbô. An langit asin dagâ pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangnan. Hosanna sa kaitaasan.

Pamibi sa Eucaristia *(Luhod)*

P — Misterio kan Pagtubod.

B — An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.

P — Huli saiya, asin kaiba niya, asin sa saiya, saimo Dios Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niamo *(Tindog)*

P — Natukdoan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na

pinapatawad niamo an mga nagkakasalà samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — Huli ta saimo an kahadean, asin an kapangyarihan, siring man an kamurawayan sa mga kapanahonan.

P — Jesu Cristong Kagurangnan, ika na nagsabi sa saimong mga Apostoles:

Katoninongan iwinawalat ko saindo, an sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog susog sa saimong kabotan. Ika na nabubuhay asin naghahade sa kapanahonan kan mga panahon.

B — Amen.

Pagpahayag kan Katoninongan

P — An katoninongan kan Kagurangnan danay na mapa-saindo.

B — Asin sa saimong espiritu.

P — Magpatinaraohan kamo nin katoninongan

Cordero

B — Cordero kan Dios, na nagpaparà kan mga kasâlan kan kinaban: kaheraki kami. Cordero kan Dios, na nagpaparà kan mga kasâlan kan kinaban: kaheraki kami. Cordero kan Dios, na nagpaparà kan mga kasâlan kan kinaban: tawi kami nin katoninongan.

Pag-alok sa Pagcomunión *(Luhod)*

P — Uya an Cordero kan Dios, uya an nagpaparà kan mga kasâlan kan kinaban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunyon

(1 Jn 3, 16)

(Sinambit kun mayong Awit sa Comunyon)

Huli kaini, namidbid ta an pagkamoot kan Dios: na nagdusay siya kan saiyang buhay para satô; asin dapat kitang magdusay kan satong buhay para sa kapwa.

Pamibi

Pakacomunion (Tindog)

P — Mamibi kita.

Kagurangnan, an langitnon na misteriolugod magin para samo bulong nin kalag asin hawak, tanganing makisumaro sa saiyang pasion sa pagpahayag kan saiyang Pagkagadan asin magin mga paramana kan saiyang kamurawayan. Siya na nabubuhay asin naghahade sa kapanahonan kan mga panahon.

P — Amen.

RITO SA PAGTAPOS

Solemneng Bendicion

Ordinariong Panahon
(Bendicion ni Aaron [Bil 24-26])

P — An Kagurangnan mapasaindo.

B — Asin sa saimong espiritu.

P — Iduko an saindong mga payo asin maghagad nin bendicion sa mahal na Dios.

Bendicionan kamo asin amponon nin Kagurangnan.

B — Amen.

P — Ipasiring nin Kagurangnan sa saindo an saiyang lalawgon asin kaherakan niya kamo.

B — Amen.

P — Atamanon niya kamo asin iwaras sa saindo an Katoninongan.


B — Amen.

P — Asin bendicionan kamo kan Dios na makakamhan: an Ama, asin an Aki, ✠ asin an Espiritu Santo.

B — Amen.

P — Lakaw kamo sa katoninongan ni Cristo.

B — Salamat sa Dios.



PAMIBI PARA SA TAON KAN MISION SA MGA NACION

O Dios, mamomoton niamong Ama, pinadara mo an saimong Bogtong na Aki sa kinaban tanganing iharubay an Marahay na Baretâ nin kaligtasan sa gabos: sa mga makasâlan, sa mga dukha, sa mga inaapi, sa mga naghehelang, sa mga hinaboan, sa mga pinabayaan. Iduyos niya an saiyang buhay sa Cruz para samo. Asin nabuhay-liwat sa bâgong buhay tanganing iligtas kami asin makipag-olitan saimong. Ipinadara mo an saimong Espiritu Santo sa mga Apostoles tanganing ipadagos an gibo kan saimong Aki asin darahon an gabos sa kaligtasan.

Nagpapasalamat kami saimong Ama, sa pagdara samo gikan sa kadikloman pasiring sa kaliwanagan. Huli kan saimong mamomoton na plano, limang gatos na taon na an nakaagi, nag-abot sa samong ronâ an mga misionero tanganing iharubay sa samong mga kamagurangan an Evangelio ni Jesus, saimong Aki, Huli kaini kami nagin saimong banwaan asin Simbahan. An balaog nin pagtubod an samong antabay sa kadikloman asin sa kaliwanagan, sa mga kadaogan asin kapangganahan kan samong kasayasayan bilang saimong banwaan. An samong pagtubod nagin tunay na liwanag na nagbabanaag sa kadikloman.

Bagoha samo an biyaya kan saimong Espiritu na nagsasadol samo na magin mga saksi ni Jesus saimong Aki, sa kinaban na baranga huli sa kapasloan, violencia, injusticia, kahelangan asin pagtios.

An samong pagtubod makadara lugod samo sa pagkasararo bilang mga aki mo na atamanon asin kamotan an lambang sarô. An Espiritu Santo magpakusog logod samo tanganing kami magin mga paraharubay kan Marahay na Baretâ sa samong mga tugang sa Asia asin sa gabos na mga nacion. Tawe kami nin odok sa boôt na kamawotan na tabangan an samong kapwa na madara sinda sa pagtubod sa Kagurangnan na si Jesus tanganing makahiras sinda sa saimong kaogmahan asin buhay.

Antabayan asin ipamibi lugod kami ni Nuestra Señora de Peñafrancia, an Bitoon kan Pagharubay kan Marahay na Baretâ, sa samong buhay asin sa paghiras kan samong pagtubod sa samong kapwa.

Lugod an samong lipotok na pagkamoot asin devocion saiyang samuyang Mahal na Ina, maghubog samo na magin mga tunay na disipulos asin mga saksi ni Jesus sa gabos, andam sa gabos na panahon na magin makinuyog-kuyog sa anuman na hagadon ni Jesus samo.

Ini hinahagad mi sa ngaran ni Jesu Cristo, saimong Aki, na nabubuhay asin naghahade, kasarô kan Espiritu Santo, Dios, sa kapanahonan kan mga panahon. Amen.



sambanwá
GIYA SA PAGSAMBA KAN BANWAAN NIN DIOS



MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID**, Mga Editor

Hinimo asin inandam kan Archidiocesis nin Caceres, sa pangengenot kan Caceres Commission on Communications asin Commission on Liturgy.
Ciudad nin Naga, Pilipinas • 2021

TABANGAN NA MASUSTENIR AN SAMBANWÁ!

Para sa mga donacion, puwedeng magdeposito sa:
Banko asin Branch: **BDO UNIBANK, INC. (BDO) PANGANIBAN DRIVE, NAGA CITY**
Account Name: **CACERES COMMISSION ON COMMUNICATIONS**
Account Number: **008440050319**